

CARATI JÕ PJÊ WÛR Pawrô Jõ Kàhhôc

Ûhÿ, pê Pawrô pê Jeju jarkwa namemprar catêjê nõ, ne ma Carati jõ pjê kamJeju na mehkwy mehkri atajê mã, pomcu me hõ kàhhôc cahyt ita kujate. Na pê hõ kàhhôc japry ita pê **Carati Jõ Pjê Kam Jeju Na Mehkwy Jakrã Mehkri Atajê WÛr, Pawrô Jõ Kàhhôc** (Carati).

Ne ihkàhhôc ita kam, cute me cumã ihhêj xi catêjê cawpa to hajÿr he: “Nee hipêr me cute me Juta catêjê te amji kam me hapac xà wej tũm atakôt me ipa xà nare. Jũ wÛr quê Pahpãm pahte me pajapên xà impejti ton itajê kôt, me pahna amji capa. Ne jũ wÛr quê me panquêtjê me, jũmcaca xà kôt me papa xà ita kôt, Pahpãm me pahna amji capa. Ne Jeju to quêt amji mã me pahhimej, ne kam me pahhônco, mã cute me pamã pahteamji kam me pajapac xà intuwti jõr xà ita kôt, quê ha Pahpãm me pahna amji capa” hajÿr.

*Pawrô te amji kôt harên xà
Me Hàpên Xà 16.6; 18.23*

¹⁻² Hàpà me ikwÿ pê Jeju na mehkwy, ca Carati jõ pjê kam ame akrí atajê. Ipê Pawrô, ne ipê Jeju jarkwa na iprar catê. Ne itea wa ijarkwahyr, mã ijarkwa kôt cute me amã ihkàhhôc ita ton. Ne Jeju jarkwa na iprar xà ita caxuw nee jũmjê xũmre te me icapi nare, ne nee jũmjê xũmre

kôtPahpãm te icapi nare. Ne quêt Jeju Crixto me, Hũm pê Pahpãm te hacpỹa mã to ihtĩr ata me ri ajwar ijapẽn xà ita caxuw icapi. Ne ita ri Jeju kam ajpẽn to me pahte amji to me pahkjêjê kwỳ, icahê na mehkrĩ itajê te me amã amji jarẽn kujahêc.

³ Imã Pahpãm pê me pajõ Inxũ me, me pajõ Pahhiti pê Jeju Crixto te me ato impejti na me ato prãm. Ne cute me acaprĩ, ne me acaxwãm pê me acaxwỳn kam me amã me acarĩcti, impejti jõr to ipa na, imã me ato prãm.

⁴ He Pahpãm mã me pahcunea pê mehkên ton catêjê, cwỳrjapê ri ihtỳjme pahkên mã me paxàr xà. Ne pê Jeju ihtyc mã amji gõ. Cute me pahkên mã me paxàr xà ata pê me pahto cator xà caxuw cumã amji gõ, mã me pancwỳrjapê ihtyc. Mår quê pjêkam, cute me amji kam hapac xà kên ita pê me pahto cato. Hõ, ita na pê me Pahpãm pê me pajõ Inxũ Cati ihkra pê Jeju Crixto to prãm.

⁵ Cwỳrjapê ri imã amcro cunea kam me pahte Pahpãm mã me:

— Mehcunea jirõa pê quêt acatihti, ne apejti rohnỳtti mã — hajỳr to prãm. Ampeaj kam!

*Cu ha cute me pamã ihhêj catêjê par nare
Roman 16.17; Coroxo 2.8; 2 Petrõ 2.1-3*

⁶ Pỳhàpà! Mã ajte xãmte ramã me ate, pê Jeju hàncaprĩa kam amji kôt Pahpãm wỳr pry ata kôt me ana ahwỳ, ca ihkôt me amõr cahtiri, ramã ate me cumã hikran! Pê Pahpãm Jeju te amjikam hapac xà na ihkôt me amõr prãmte me ana ahwỳ, ca ihkôt me amõr cahtiri ihhêj ne ramã ate me cumã hikran! Ne ajte ita caxuw

Pahpām wỳr ajteare mǎ, me amǎ jǔm te amji kam hapac xà nǒ ita kôt ame apa.

⁷ He xà ajkĩ ampeaj kam me Pahpām wỳr pry jàhtô? Hǎpà! He Jeju te amji kam hapac xà ita pê ri pry pyxit peaj ata, Pahpām wỳr. Wa ite curijǔmjê itajê te Jeju te amji kam hapac xà têtê ame girên to me ipa na me garên par. Ne cute me amǎ ampo to hahkre xà atajê kôt ri, me akrǎ cunĩ pit. Neihtỳj Jeju te amji kam hapac xà pejti ata to me amǎ ihhêj to me ipa.

⁸ He imǎ jǔm te Jeju ràn xà na ajteare mǎ me amǎ ampo kên to hahkre catê atajê to, Pahpām te Xatanaj jô cuhy catia ata kam, mehkên mǎ me mên rohnỳtti mǎ na, me to prǎm. Wa ha meite mǎn Jeju ràn xà na ajteare mǎ me amǎ ampo to hahkre na, wa ha itỳj Pahpām te me ito kên na, imǎ amji to prǎm. Ne quê còjkwa pĩn Pahpām mǎmemprar catê nǒ wrỳ, ne Jeju ràn xà na, ajteare mǎ, me amǎ ampo to hahkre na, quêha ihtỳj imǎ Pahpām te cuhy catiaata kam ihkên mǎ mên na, imǎ to prǎm.

⁹ He pê wa mam me amǎ ampo to hahkre, pê ca ahna me amji capa ata ràn xà na, xà wa ha ajkĩ hipêrajteare mǎ ihkaj na me amǎ ampo to hahkre? Hǎpà, wa ha hipêr me amǎ ite to hahkre xà atajê to pit mǎ hahkre. Ne quê ihhêaj to jǔm ita, Jeju ràn xàna, ajteare mǎ me amǎ ampo to hahkre ata ri, imǎ Pahpām te cuhy catia kam ihkên mǎ mên rohnỳttimǎ na, imǎ me to prǎm.

¹⁰ Ne por ame amǎ ihhêj to ipa, ca kam me akrǎ cunĩhti atajê ri, ito meamǎ ihhêj to hane he:

— Por Pawrô me amǎ ampo to hahkre atajê kôt

hamreare. Ne ate mehkîn prãmte ri ame amã ihcakôc to ipa — hane. Wa nee meate me ikîn prãmte ame amã icakôc nare, ne quêt Pahpãm te ikîn prãmte, wa ame amã icakôc. Wa pjê ita kam ite amji to mehcajpuaw prãm na mã, wa ha nee cumã ijàpên xà, pê Jeju mã iprar catê ita, mã ixàr nare.

*Pê Jêua harkwa na imprar catê na Pawrô xãm
Me Hàpên Xà 26.9-20*

¹¹⁻¹² He por atajê te hanea ne, pom ite me amã ampo to hahkre xà itajê, nee Pahpãm pîn cator nare na me harê. Cwýrjapê Jeju kam me ikjêjê, wa ha ita cunea na me amã amji jarên to capô partu ne. He wa nee ite ikrãa kamita to amji kam ijapac, ne ame amã harên nare. He nee jùm xùmre te me caxuw imã hõr nare, ne nee jùmjê te me caxuw imã ita to hahkre nare. Ne Jeju Crixto te ri imã itajê cunea jahkre pej na iton, ne imãipêr.

¹³ He pê ca ramã me ijarên pa, pê wa ajco mam Juta catêjê te amji kam hapac xà kôt ipa xà ata kam, pê wa ajco Pahpãm na mehkwy jahkre kêt kam, ijàprêa kam ipa. Ne cute me amji pupun xà kèanre na me ton to ipa. Ne ajco ite me to hamre prãmte ihcunea na me ton to ipa.

¹⁴ Ne pê wa amcro atajê kam, ajco me ikwy pê Juta catêjê te amji kam hapac xà kam, me ikwy pê ajkam me icati jirôa pê catyt kam, me iquêt xwýpê Mojxe te me hapackrexà kôt ipa. Ne pê wa ajco me iquêtjê caca xàa kôt, caxwãm catia mã, catyt kam ipa na ajco amji to ahcukij.

15 He pê wa cormã ipÿm nare kam, pê ramã Pahpãm hàhcaprĩa kam amjia kôt amji mã icapi, ne ina ahwÿ, cumã ijàpên prãmte.

16 Wa ite mehcahkrit pê, por me cupê Juta catêjê nare atajê mã, Jeju jarên, ne ipêrprãmte, pê Pahpãm imã ikra jahkre ne imã cupê. Ata caxuw pê wa nee jũm xũmre wÿr ipicahur nare, cute imã Jeju te amji kam hapac xà to hapackre prãmte.

17 Pê wa nee hanea ne Krĩpinkrên wÿr itêm, ne mam, icumam me cupê Jeju jarkwa na memprar catêjê atajê nõ cukij nare, cute imã Jeju te amji kamhapac xà to hahkre prãmte. Ne ma cama Põcaprÿhti jõ põti kam me hamreare ata wÿr itêm pyrentu. Pê curia Jeju imã cute amji kam hapac xà to hahkre, jirô pê mã wa ma, Tamatcô jõ krĩ wÿr ite amji jaxàr.

18 Ne pê wa Krĩpinkrên wÿr itêm nare to amji to caku to incrê, jirô pê, pê wa cormã Petrô pupun. Ne cumã icakôc prãmte Krĩpinkrên wÿr tẽ, ne icato, ne curia cahê na amji to putwÿr jĩkjê to hamre.

19 Pê wa nee Jeju jarkwa na memprar catêjê nõ pupun nare, ne ite Tijac pê Jeju tõ te amji to hapu na kjê atame, Petrô pit pupun.

20 He ampeaj kam wa Pahpãm kam mare mã, me amã awjarê, pom wa ampo cuneato awjarê itajê, nee mã ihêj xi nare, ne ampeaj kam pê Jeju imã to hahkre.

21 Pê wa Petrô pupun jirô pê, ma Xiri jõ pjê me, Xirixij jõ pjê kam amehkrĩ atajê kwÿ kôt apu mõ.

Pê Jeju Pawrô te amji kam hapac xà cunea to antuw

²² Ne pê amcro atajê kam, nee Juta jô pjê kam JejuCixtô na mehkwy atajê me ijahkre pej, ne mento jãa to me ipupun nare.

²³ Ne pê cama ajco me cumã me ijarên to hane he:

— Por pê Pawrô ajco Jeju to amji mã me pahhimpej tête me pahcahpêrkà ata ri, ita caxuw ihtyjmehcunea mã, cute amji mã Jeju to mehhimpej na me ton to ipa — hajÿr na cute me ijarên par.

²⁴ Ne cute me ijarên par xà ita kôt ri, ihtyj Pahpãm to amji mã me hàmnãn to me ipa.

2

Pê mam Jeju jarkwa na memprar catêjê atajê Pawrô pejti na harê

Me Hàpên Xà 15.1-11

¹⁻² Ne ina caku te cwatôxi jirô pê mã, Pahpãm te hacpÿa mã Krîpinkrên wÿr itêmto imã hÿjarên, wa ite impar, ne ma amji jaxàr. Ne ma amji kôt Parnap me Tito pê Crec catêjê nõ ata me, me pra, ne curi me icator. Ne ite Jeju namehkwy jô pahhi catêjê pit me, me cuprôn, wa ite me cumã mehcahkrit pê Juta catêjê nare atajê, mã Jeju jarên xà atajê cunea na, amji jarên. Neampo na wa ite cumã catyt kam amji jarên to hajÿr? Ihtyj ame ite amji kam ijapac xà ita kôt hamreare na mehcãmjĩ cupate, wa ite me cumã harên par.

³⁻⁵ Mã cute me, ite me cumã harên xà ita na me ipar, ne ahna me cumã impejti. Mã ikôt mehkwy cator atajê te me cupê Jeju na mehkwyà na me

cumãamji jarën. Ne hamreare, imãa cama ame cumã mehhêj. Ne ampo na ri curi me cator? He cama cute ame ikôpîr prãmte, mORMÕ wa ajkî Juta catêjête amji kam me hapac xà me, Mojxe xwÿ te me hapackre xàa kôt, ajkî me mÕ. Mã cute ahna me ipupun prãmte, curi me cator. Ne cute me ikôt mÕr catê pê Tito pupun, mã nee cupê Juta catêjê nÕ nare, na pê neeme ipê Juta catêjê caca xà kôt amji mã impy kà kwÿ jakep nare. Cwÿrjapê ri me imã:

— Ampo na mã ca me pancaca xà to pahte me amji pyrác xà kôt, nee ate me Tito mã impy kà kwÿ jakep nare? Me imãa, me cupê Jeju na mehkwy cuneate hanea ne ihtÿj me panquêtjê te amji kam hapac xà to, cute me amji pyrác xàatajê cunea kôt me ipa xà — hajÿr. Wa nee ite me kam ijapac nare, ne cama, ma ame amji pê cute amji kam me hapac xà ita cunea curé. Ampona? He wa nee me iquêtjê caca xà itajê me, Jeju te amji kam hapac xà impejti ita to me ipicacwÿr prãm nare. Ampo na? He Pahpãm te amji kam hapac xà impejti ita kôt ri, me apa na imã me ato prãm. Xà Jeju namehkwy jÕ pahhi catêjê atajê te ajkî Tito mã impy kà kwÿ jakep na, me imã hÿjahkre? Hãpà! Nee cute ahna me imã hÿjahkre nare!

⁶ Mã Tijac me, Petrô me, Jowãw pê Jeju na mehkwy jÕ pahhi catêjê na cuteme imã harën atajê te nee, ite ampo to ihcupan xà nÕ mã cator nare. Na ri nee cute me, ite amji kam ijapac xà ita jirô pê, me imã ampo jarën, ne tomehhimpej nare. Ne me cupê Jeju na mehkwy mã ihtÿj amji

mã me hũmre itajê cupa to me ipa, ne me ajpẽn mã:

— Pê me hũmre itajê mento jĩa to me Jeju pupu, cwȳrjapê ri me hũmrecunea jirô pê me cati — hajȳr. Wa nee ampo ita to amji kam ijapac prãm nare. Ampo na? He Pahpãm mã me pahcunea jahkre pej pejtu, ne cumã me pahcunea pipẽn pit.

⁷ Ne me cupê pahhi catêjê atajê mã ijahkre pej, Pahpãm te ite mehcahkrit mã, Jeju te amji kam hapac xà jarẽn catê na, cute ixãm na me ijahkre pej, ahnaamã cute Petrô, pê me cupê Juta catêjê mã Jeju kôt harẽn catê na hãm he.

⁸ Pê Pahpãm mehcahkrit mã, ite Jeju jarẽn xà caxuw, imã ikrã kre te amji jahkre pej xà gõ. Ne hanea ne me cupê Juta catêjê mã Petrô te Jejujarẽn xà caxuw cumã ihkrã kre te amji jahkre pej xà gõ.

⁹ Ne wa ite Jeju na mehkwy jamãr catêjê atajê me, Pahpãm te me imã ijapẽn xajõr ata na me ajpẽn par pej jirô pê mã ri, cute ahna Parnap me ijahkre pej, ne mehkwy kam mare mã, cuteme imã:

— He cu me pahcunea Pahpãm mã hapẽn xà pyxit peaj ita tõ pit mã me apê. Ne me atekjê pê, mehcahkrit jõ pjê kam me ipa atajê mã, ate me Jeju jarẽn xà. Ne me pa, wa ha me cupê Juta catêjê jõpjê kam ame ipa atajê mã Jeju jarẽn.

¹⁰ Ne cormã ampo ata pyxit peaj ri, ate ton xà. Nee mã ampo nare, he ita ri Krĩpinkrẽn kam Jeju na mehkwy pê, me pahkwý kwý mehkri itajê pê ampo hamreare, na caha ihmãt ri pjê nõa kam, me pahkwý mehkri atajê mã me harẽ, mãr quẽ

me harĕn pa, ne ajpĕn me cumã ampo kujate — hajÿr. Wa ite me kam ijapac, ne me cumã:

— Imã ri quĕt ita ton to prãam to prãm rohnÿtti mã — hane. Ne ite me ajpĕn par jirô pĕ mã, wa ma hacpÿ mã Antijoc jô krĭ wÿr me pra.

*Pĕ Pawrô Petrô te to ihcupan xà jarĕ
Roman 3.21-23; 6.1-14*

¹¹⁻¹² Ne jũ mã me ina amcro te, mã ma Petrô Antijoc jô krĭ kam me iwÿr tĕ, ne curi cute to ihcupan to hajÿr he. Pĕ ajco Petrô Antijoc jô krĭ kam, mehcahkrit pĕ Jeju na mehwÿ cahê na ihkrĭ, ne ajcoapà, me cupĕ Juta catĕjĕ te amji kam hapac xà kaj na. Ne Pahpãm mã, nee ita na ihkaj na nare. Ampo na? He Pahpãm mã me pahcunea pipĕn pit. MãTijac cormã Krĭpinkrĕn kam ihkrĭ, ne cute Petrô wÿr jũmjĕ itajĕ kujahĕc, cute me hõmpun prãmte. Mã curi me cator, mã Petrô te mehõmpun, ne taa amji mã:

— Wa ha mehcahkrit itajĕ cahê na ijapàn kam to icrà, quĕ ha me hũmre itajĕ me ipupu, ne me amji jaxà, ne me ijarĕ, quĕ ha ahna me kam ipahàm — hajÿr. Na ri cute mehcahkrit atajĕ cahê na hàpànjicu, ne me cupĕ ampÿa mã hÿr, ne ahte jÿ ne apà.

¹³ Mã hanea ne Antijoc catĕjĕ kwÿ pĕ Jeju na mehwÿ pĕ Juta catĕjĕ te me hajÿar, ne cuteme amji to caprâr, ne Petrô kôat, nee hipĕr Jeju kam ajpĕn to mehkjĕjĕ, ne mehcahkrit atajĕ cahê na amehapàn nare. Mã hanea ne Parnap te hajÿar, ne cute amji kam me hapac xà kĕn ata kôt, mehcahkrit atajĕ mã hikran.

14 Wa ite, cute me Pahpām jō pry pejti ata cupan na, me hōmpun pyrentu, ne me kam mare mǎ, Petrô kuc ri, cute to ihcupan ita tēte cumān to:

— Pÿhàpà! He apê Juta catêjê nōa cakrô, ca nee ajte catyt kam ihcunea na Juta catêjê caca xà kôt apa nare! Mēr ampo na mǎ ca Juta catêjê caca xà kôt mehcahkrititajê ton to me apa to prām? Nee ate me hajÿr xà hamreare! — hajÿr.

Pê Pawrô Juta catêjê mǎ ahna ihkôt harê

15 Ne curi me cupê Juta catêjê pê Jeju na mehkwy, me jÿ atajê mǎ, ite ihcunea na ihkôt harēn to hajÿr he:

— He me pahpÿpÿm xà kôt ri, me papê Juta catêjê impeaj, ne nee me papê ampo kra cahkrit pê Pahpām te to ihhimpej xà jahkre kêatre atajê kwÿ pyrác nare.

16-17 He me pamǎ Pahpām te, nee Mojxe xwÿ te me hapackre xà kôt me ipa atajê na, cute amji caxàrnare na, me hahkre pej. Ne quêt Jeju Crixto to amji mǎ mehhimpej xà ata kôt ri, Pahpām me ahna amji to pōj. He me papê Juta catêjê me, mehcahkrit atajê me, me Pahpām mǎ me pahcunea pê, me to ihcupan catêjê. Nāmri quê ha mehcahkrit atajê te amji mǎ Jeju to ihhimpej na, quê ha Pahpām mǎ jūmjê atajê impejti ita na. Ne me papê Juta catêjê te mehajÿar. Na cu ha hapac xàa kôt, me ajpēnto me papicokjêr jicu, ne mePahpām te amji kam hapac xà pejti ita kôt pit mǎ me papa. Quê ha jūm ahna me pahpupu, ne me pamǎ: “Pÿhàpà, me imǎa, ca ihhêj ne ate me Jeju Crixto teamji kam hapac xà ita cryc, me papê

Juta catêjê te amji kam hapac xà jicu, ne ate me hũnâr, ne hamre ate me to ihcupan. Cwÿrjapê ri Jeju Crixto te, meate me to kên na me aton” hajÿr. Me ikjêjê, he mehcakôc xà ita kêanre. Xà quê ha pijamã Jeju Hũm pê Pahpãm te amji kam hapac xà kaj na, mepamã ampô kên to hahkre? Hãpà!

¹⁸ Ita ri, imãa ihcupan he. Ca ha me pancaca xà kôt hamreare ata mã me hikra, ne impej wÿr me apkjê, ne ana ahtũm, ca ha hacpÿa mã, mam me acacaxà kôt hamreare ata wÿr me apkjê, ita na ri ihkaj na.

Cu ha nee jũ caxuw Jeju te amji kam hapac xà pejti jicu nare

¹⁹⁻²⁰ — Jũ wÿr cu ha me pahnõ Mojxe xwÿ jõ kàhhôc kam, menquêtjê japackre xàcunea kôt, catyt kam me papa. Cwÿrjapê ri Pahpãm mã me pahcunea kêanre, ne ihhêj ne me papê jũmjê te ihkên ton jahpan xà na ihtyc to prãm atajê pyrãac. Cu ha ihcunea na catyt kam me papa na mã, quê ha nee me pancwÿrjapê Jeju ihtyc prãm nare. Na pê Jeju amjia kôt me pancwÿrjapê ihtyc mã amji gô ne ty, na cu ha pahtÿj ihtyc xà ata kôt amji mã to me pahhimpej. Ne amji mã ihtyc xà ata to me pahhimpej xà ata pê ihhêj rũm cahê na me pahtyc. Cwÿrjapê cu ha neehipêr, pahte amji to mehcajpuw prãm to ame papa nare. Na pê Pahpãm kra mã me pahkĩn, pê me pancwÿrjapê ty, ne cute me pamã amji jõr, neme pahcaxwãm pê ihkrĩ, ne catyt kam ihkôt me papa xàcaxuw, cute me pamã carôt jõr.

²¹ Ita kam, xà wa ha ajkĩ Jeju te amji kam hapac xà jicu, ne hacpÿa mã me iquêtjê te amji kam hapac xà wÿr apkjê ne hũnã? Hãpà! Wÿr waha hicu!

— Pê Pahpãm Mojxe xwÿ mã hõ kàhhôc kam Juta catêjê mã, cute mehapackre xà gõ ata, nee Pahpãm te ihkôt me pahna amji caxàr xà caxuw impejnare. Quê ha caxuw impej na mã, quê ha nee Jeju ihtyc prãm nare. Ne ampo caxuw ri impej? He cute me pahkên na me pajarên, cu pahte me hahkre pej, ne Jejuwÿr me papipkjêr xà caxuw ri impej. Ne Jeju pê Pahpãm kra ata kôt ri, me pahna amji to pôj — hane. Hõ, pê wa me cumã harên to hane.

3

Quê ha Pahpãm nee me pajàpên xà impejti kôt mepahna amji to pôj nare

Carati 5.16-23; Tito 3.4-7

¹ Pÿhàpà, ca Carati jõ pjê kam me akrĩ itajê, ca ihhêj ne ame ato kam waj. Ampo na? He ihhêj ne me apê amji jahkre kêatre. He ihhêj ne jũmte me ato hy. Mãr pê wa hirãa pê me amã:

— Me pancwÿrjapêa ri pĩ kam Jeju tyc — hanena harê ta? Nõ na mã ca, Pahpãm te me ana amji caxàr prãmte hacpÿa mã menquêtjê caca xà wÿr ate me amjijaxàr?

² Xà pê ca Mojxe xwÿ caca xà kôt me apa xà ata kam, xà pê hõtpê ajco Pahpãm Carõ Pejti me amã amji gõ? Hãpà, nee pê me amã amjijôr nare. Ne quêt me ate amji mã, Jeju jarên par ita kam, amji mã me to hajÿr, ne amji mã me to ahimpej xà kôt ri, Pahpãm Carõ Pejti te me amã amji jôr.

³ Pÿhàpà, ihhêj ne me apê mehkrã nare catêjêpyràc. He pê ca Jeju toamji mã me ahimpej kam me to atêm xà ata kam, pê Pahpãm me amã amji Carõ Pejti gõ, mâr ca, carôat kôt, ihkôt me apa. Hõ, pê ca amji mã me to ahimpej kamto atêm to hane. Nõ na mã ca ita caxuw ihhêj ne Mojxe xwÿ caca xà wejti ata kôt, ate me to ihkrã curan to prãm to mã, ca hÿrmã me apipkjêr? Ne me carôat kôt mehkôt ame apa prãm.

⁴ He xà ajkĩ ihcaprÿ na Pahpãm Carõ Pejti te ramã me ate amji kam me gapac xà tuw pejti ato ipijapar toiryti to hajÿr? Hãpà, imã nee cute ahna hajÿr nare!

⁵ Pê Pahpãm amji Carõ Pejti kôt, ihcunea na, me amã ate amji jahkre pejti gõ. Ne cute me akam hãpên xà catia ton atajê to, cute amji carôtto ipipê, mâr quê mehcunea me hõmpu, ne me akwÿ kam carôt ata jahkre pej. He xà ca ajkĩ, Mojxe caca xà wejti kam, ate me atêm xà ata kôt mã, ame atohane? Hãpà! Ne mër ampo na mã cute me ato hajÿr? Nee mã ampo na nare, he me ate me Jeju jarên par xà ata to amji mã me ahimpej na ri, cute me ato hajÿr.

Pê Aprãw Pahpãm to amji mã ihhimpej, na pê ahna amji capa

Roman 4.1-25

⁶ Ca me iquêtswÿ pê Aprãw to me amji japackre! He xà pê ajkĩ catyt kam ipa, ne nee jũ caxuw ampo kên ton nare cwÿrjapê pê Pahpãm ahna amji capa? Hãpà. He pê Pahpãm Aprãw mã:

— Ate amji mã ito ahimpej, cwÿrjapê ri imã apê catyt kam apa catê — hane.

⁷ Cwÿrjapê ri mehcunea amji mã me Pahpãm to ihmipej atajê pê Aprãw tàmwxwÿa pyràc.

⁸ Pê rÿ pèa mã Pahpãm amji mã:

— Wa ha itÿj jũ caxuw pjê kam mehcahkrit-mehkrĩ atajê te amji mã ito mehhimpej xà ata kôt, me ahna amji capa — hane. Cwÿrjapê pê Aprãw xwÿ mã:

— Acwÿrjapê wa ha pjê cunea kammehkrĩ atajê cunea to impejti ne — hane.

⁹ Mã Aprãw te Pahpãm to amji mã hajÿr, cwÿrjapê ri cute ahna amji caxàr ne to impejti. Cwÿrjapê quê ha Aprãw cuxà mehcunea te Pahpãm toamji mã hajÿr na, quê ha ihtÿj Pahpãm me ahna amji to pøj, ne me to impejti ne.

Jũ wÿr cu me panquêtjê caca xà kôt me papa kôt Pahpãm cajpuaw.

¹⁰ Quê ha me pahnõ amji mã:

— Wa ha Mojxe xwÿ te me hapackre xà cunea na ihkôt amji kampa, quê ha Pahpãm ihtÿj ina amji capa — hajÿr na, quê hataa, amji curê capa. Ampo na? He jũ wÿr cu me pahnõ Mojxe te me hapackre xà cunea kôt hakop, ne nee ihnõ to gapac kêt nare. He pê ramã Pahpãmhõ kàhhôc kam amji mã Mojxe caca xà kôt me ipa catêjê crôn to hane he:

“Quê ha jũm te, amcro cuneakam ite Mojxe mã ijarkwa jirên mã cute ahna ihhôc ata kam hapac nare na, wa ha itÿj apu kamicryc, ne apu cucrô. Quê ha cama pyxit peaj ne to hapac kêt cacrô, wa ha itÿj hahpan xà na apu to kên” hane.

11 Pê ramã rỳ pêa mã Pahpãm jarkwa to ihcakôc catê japyrê te Hapakuc ita Pahpãm jarkwa kôt hõ kàhhôc kam, ita na ihhôc to hane he:

“Quê hajũm ito amji mã ihhimpej na,
 wa ha to amji kam ijapac to,
 cupê jũ caxuw jũm te icuna mã ampo kên ton
 nare catê ata rohnýtti mã.
 Na wa ha itỳj ahnaamji capa,
 quê ha icahê na icarôt kôt ihtĩar na ipa rohnýtti
 mã” hane.

Ne cute harên xà ita kôt, cu ramã pahte me amji jahkre pej. He jũ wỳr quêha Pahpãm pahte Mojxe xwỳ te me hapackre xà kôt me papa xà ita kôt, me pahna amji capa.

12 He Mojxe te me pajapackre xà ata, nee me pahte Pahpãm to pahte amji mã me pahhimpej na me pah-ton nare, ne ajte me pajapên xà na, pahte amjito me hajỳr na pit mã me pahto. Ampo na? Pê ramã Mojxe ampo itajê na Pahpãm te cumã amji jarên xà na, hõ kàhhôc kam ahna ihhôc to hane he:

“Quê ha jũm te ite me cumã ijarkwa jirên xà itajê
 cunea to amji kam hapac to ipa,
 ne nee jũ caxuw ihnõ to hapac kêt nare na,
 wa ha itỳj ahnaamji capa,
 quê ha icahê na ihkrĩ rohnýtti mã” hane.

13 Nãmri quê ha me pahnõ te Mojxe te me hapackre xà ita jirô pê ihpỳmna, quê ha taa amji curê capa, quê ha Pahpãm ihkên mã cumê.

Ne jũ wỳr cu me pahnõMojxe te me hapackre xà atajê cunea kôt me papa. Cwỳrjapê cu ha mepahcunea Pahpãm mã me amji curê capa. Na ri Jeju te ita na me pajahkre pej, ne me pajaxà kam pĩ kam ihtyc. Ne ihtyc xà ata te ri me pahcurê pê me pahcaxàr. Ne Pahpãm jõ kàhhôc kam, ramã cute ita na harẽn to hajỳr he:

“Ne por quê ha jũm pĩ kam ajêt ne ty,
ata to, pê Pahpãm ramã amji mãincrôn hiah-
pũro,
ne toa cute curê mã mẽn” hane.

¹⁴ Ne měr ampo na pê Jeju pĩ kam ty? He nee mã ampo na nare, por pê Pahpãm Aprãw mã ampo catia to awjahkre ata, quê ha Jeju Crixto tyc xàata kôt, hanea ne me apê mehcahkrit mã hõr xà. Mår cu, me pahcunea, Pahpãm te me pamã Carõ Pejti to hũjahkre ata cwa. Ne Jeju Crixto to pahte amji mã me pahhimpej cwỳrjapê, quê ha me pamã cugõ.

Pê Pahpãm ampo to hũjahkre ata, ampo cunea jirôa pê irohnytti mã

Roman 3.19-20; 5.20-21; 11.32

¹⁵ Jeju kam me ikjêjê, wa ha hirãa pê me amã ampo ita kôt harẽ, mår ca me kam gapac to impeaj ne. Cu ha me pahnõ ajkrut ne ampo na ajpẽn pa, ne to amjimã awjahkre, ne ahna amji xãm jirô pê, quê ha nee jũm hipêr ampo ata to ipicamẽn ne to ipintuw nare.

¹⁶ Pê Pahpãm Aprãw xwỳ mã ihtàmwxỳ to awjahkre. Ne pê Pahpãm hõ kàhhôc kam, nee ita to hũjarẽn to: “Mehtàmwxỳ” hajỳr nare, pê neeme

hàhtôa to hũjahkre nare, ne quêt Pahpãm hõ kàhhôc kam ita jarên to: “Ihtàmwxwỳ” hane. Ampo na? He Aprãw xwỳ tàmwxwỳ pyxít peaj pê Jeju Crixto ata to, pê awjahkre. Ne me papê Jeju kam pahte me ajpên hônco catêjê mã ri, hanea ne cute to hũjahkre xà ata.

¹⁷ Ne ampo na mã wa ame amã ijũjarên to hane? Nee mã ampo na nare! Pê Pahpãm rỳ pêa mã Aprãw me, ihtàmwxwỳ mã, ampo catia to awjahkre ata na, ramã caku jàhtô te cwatxênta ne ihkôt cute trĩnta jirô pê, pê Pahpãm Mojxe mã ajteare mã cute amji kam hapac xà gõ. Ne curmã Mojxe te me hapackre xà tuwti ita, quê nee rỳ pêa mã Pahpãm te Aprãw me amji ton na, me ajpên par xà ata to hamre nare.

¹⁸ He me amã ihhêj catêjê atajê ri me amã ihhêj to hane he:

— Cu ha nee Mojxe xwỳ caca xà ata kôt me papa nare na, quê ha nee Pahpãm mepamã cute ampo to hũjahkre xà ata jôr nare — hane. Ne cute harên xà ata hêj xia to hêj xi. Ampo na? Quê ha ita pê ampeaj kam na mã, quê ha ihtỳj Mojxe teme hapackre xà ita, Pahpãm te amji kam hapac xà to, cute me pamã hũjahkre xà ita to hamre. Ne nee ita te hajỳr nare, ne cute Aprãw xwỳ mã to hũjahkre xàata kôt, amjia kôt to impejti.

Pê Mojxe jô kàhhôc ita, pahte me to ihcupan xà to me pamã ajpê

¹⁹⁻²⁰ Pê Pahpãm Aprãw me pit mã ajpên pa. Ne nee pê Pahpãm hỳrmã jũm kujahêc, pê cumã hũjarên nare. Pê Pahpãm Aprãw kuc ri cumã awjarê, ne cume ajpên pa. Ne Mojxe nare, pê

nee Pahpām to hajÿr nare. Pêcôjkwa kam cumã memprar catêjê mã, cute amji kam hapac xà ita gō, pê ma Mojxe mã cugō, pê ma Mojxe to me cupê Juta catêjê japackre. Caihhêaj to me anō amji mã:

— Ampo caxuw mã Mojxe te me pajapackre xà ita pej? — hane. Ýhÿ, wa ha me amã harê. He mehcunea te Pahpām te amji kamhapac xà jirô pê mehpyÿm na, cute me hahkre pej xà caxuw ri, cute me hapackre xà ita. Ne cute me hapackre xà ata to me amji japackre ita na, mã ahnaa Aprãw tãmxwÿ pê Jeju Crixto ata cator. Ne nee cute meMojxe te me hapackre xà ata to pit mã, cute hipêr me amji kam hapac xà nare.

Mojxe caca xà ita nee Pahpām cahê na me papa na me pahon nare

²¹ Ca ihhêaj to me anō ita kampa, ne amji mã:

— Pÿhàpà, he ihhêj neMojxe te me hapackre xà ita, Pahpām te Aprãw me ajpên par xà ata kaj na — hane. Co he! Nee ca amji mã harên to hajÿr nare. Ampo na? He Mojxete me hapackre xà ita hōtpê impej cakrô, quê nee Pahpām cahê na mepahtîr rohnÿtti mã na me pahon nare. Quê ha cute mãn me Pahpām te me pahna amji caxàr na ton na, cu ha nee hipêr ihnō na mehprãm nare.

²² He ramã Pahpām te, me pahcunea te hō kàhhôc kam pjê cunea kam, me pahcunea te meharkwa jirô pê me pahpyÿm na, me pajarên. Ne me pahte amji kam me pajapac xà kêanre itajê pê ihhêj rÿm me pajō pahhi, mã me pahcunea to ihhimpej. Ne ma me pahte ampo

pej ton tête me pajiprõ. Ne cute me pajiprõn xà ita pê ihhêj rûm cute me pahcajpre. Ne ampo kên ton na ri ihtÿj me pajamã. Cu ha quêt Jeju Crixto to amji mã me pahhimpej, quê ha me pamã me pahcajpre ata pô, cu ha pahtÿj Pahpãm te me pamã ampo pejti to hũjahkre ata cwa.

Pê Mojxe te me pajapackre xà ita ri, Jeju cator jikaj xà me pajamã

Roman 10.4

²³ Ne mam Mojxe te me hapackre xà ata pê ihhêj rûm krãhtarea, ne ma cute ampo kên ton tête me hiprõn to hãm ita kam, mã ahnaa Jeju cator, mã cute hũhkra mã me haxàr, mãr quê Jeju to amji mã mehhimpej.

²⁴ Ne pê ihhêj ne me cupê me ahkrarea, na pê Mojxe te me hapackre xà ata, cute me ampo kên ton tête, ma mehcahpêrkàr to ipa ita na, mã ahnaa Jeducator. Mã cute to amji mã mehhimpej, mã Hũm pê Pahpãm te me ahna amji caxàr.

²⁵ Ne hamre, cu ramã Jeju to amji mã me pahhimpej ita kam, quê nee Mojxe te me hapackre xà ata me pahto ihhimpej nare.

Pê Jeju kam pahte me ajpën hõnco, na ri me papê Pahpãm kra

²⁶ Ca Jeju Crixto to me ate amji mã me ahimpej, ne kam me ajpën hõnco, na riPahpãm te me acunea to amji kra.

²⁷ Ne me pahcunea te cô to me amji cumrãr, me Jeju kam pahte me ajpën hõnco atajê pê ramãhũràac, ne cuxà cute amji kam hapac xàa kôt me papa.

28 He Jeju kam ate me ajpën hõnco ita kam, ajpën kam me pahpyxit peaj. Cwÿrjapê ri Pahpãm mã, me ipê Juta catêjê me, me apê mehcahkritme, me pahcunea pipëan. Ne me hõ pahhi catêjê jarkwa kôt cama me hâpên catêjê me, amjia kôt me hâpên catêjê me, me apipëan. Ne hanea ne me hũmre me, pyjê me, me apipëan, ne nee jũm pê ajteare mã nare.

29 He me apê Jeju tekjê ita kam ri, Jeju kôt me acunea pê Aprãw tãmwxwÿa. Cwÿrjapê ca atÿj, por pê Pahpãm Aprãw mã ampo to awjahkre ata, ca ha atÿj me acwa.

4

*Mojxe te me hapackre xà nee hipêr me pahto
ihhimpej nare*

Roman 8.14-17

1-2 Ita caxuw, wa ha hipêr me amã ite ihkôt harên xà ata kôt harê. Xà quê ajkĩ jũm, ihkra incire, ne nee cormã mehcapõn catê himpej xàkam ihkà nare, ne cormã amji jahkre kêatre ata mã, pijamã hàhcukrêj atajê cunea gõ, quê to hõ tekjê? Hãpà! Quê ha cama cumã:

— Apê ikraa to ikra, ne cama cormã acire, ne ate amji jahkre kêatre. Na ca ha ma me acapõn catê krac ri axà, ne atÿj ijâpên xà na itehcajpar toapa, ne ihhêj rũm apê cama imã gâpên catê. Ne jũ caxuw akà, ne amji jahkre pej, wa ha hacpÿ ne me acapõn catê pê gaprô, ne cormã amã ijâhcukrêj gõ, mãr ca caa, amjia kôt hamãr to apa — hane.

³ He pê mam me papê hūmre kra ata pyràac, ne pahte me amji kam me pajapac xàto pahte me amji pyràc xà pê me pahcapõn catê te amji kam hapac xà ata krac ri ame papa, pê ajco taa, me pahto ihhimpej. Na pê cute me pamã ampo cawpa xà atajê hàhtôa tó hàhtô, ne pê hanea ne ampo carõ te amji kam hapac xà atajê, ajco me pahto ihhimpej. Ampo na? He cu cormã nee me pahte catyt kam, Pahpãm jarkwa jahkre pej nare.

⁴ Mã Pahpãm te, me pahto cumã ihkra xūmre ata pyràac, ne cute me pahcapõn catê ata pê me pahcaxàr, cute ahna amji mã amcro hyr xà atana. Cwýrjapê pê, intête me pahcaxàr xà caxuw me pahwýr ihkra pê Jeju kujate, pê me hūmrea na amji to, ne Marij mã ihpým, ne Mojxe te me hapackre xà himpej xàkrac ri ipa.

⁵ Mār quê Mojxe te me hapackre xà nee me pahto ihhimpej nare. Ne Jejua kôt, cu ha quêt Pahpãm krac ri me axà, ne ihkôt me papê Pahpãm kra, ne pahtýjamjia kôt ihkrac ri ame papa.

⁶ Mã Pahpãm te me pamã ihkra Carõ Pejti kujahêc, mã cute me pamã amji jôr. Mã Carõ Pejti ata me pahcaxwãm pê me pamã:

— Apê Pahpãm kraa to ihkra — hane. Ne hanea ne me pahcaxwýn caxwãm pê Carõ Pejti ita pahte Pahpãmckuj na me pahto, cu me cumã:

— Inxū — hane.

⁷ Ne hamre, ita caxuw, nee me papê cama me hõ pahhi jarkwa kôt me hàpên catêjê nare, ne me papê Pahpãm kra. Ne me papê mehkra ita

kam ri, ihtỳj me pamã, cumã cute ampo pejti to hũjahkre atajê cunea gõ.

Cu ha nee hipêr me panquêtjê te me to ihhimpej xà kôt me papa nare

Coroxo 2.16-19

⁸ Pê rỳ pêa mã, cormã nee ate me Pahpãm jahkre pej nare kam, pê ca ajco me aquêtjê te amji kam hapac xà pit to amji mã me ahimpej to meapa. Ne ajco me amã me carõ me, cupê jarôti me, ampo cawpa xà kên me, ampo cunea kwỳ cupaa to hũpa. Ne ajco atỳj Pahpãm kaj na ampo to ame pahpãm. Mã pahpãm cahàc atajê mã nee carôt nare.

⁹ Ne ita caxuw, nee cute hajỳr nare. Ne me amã Pahpãm jahkre pej, ne hanea ne Pahpãm mã me gahkre pej. Ne mêr ampo na mã ca ajte hacpỹa mã meaquêtjê te amji kam hapac xà kôt hamreare ata wỳr ate me amji jaxàr? Neampo na mã ca ajte hipêr atỳj ampo cawpa xà me, ampo carõ kên atajê to ame amji kampa, ne ame to amjijapackre? Mã taa hacpỹ mã me ato ihhimpej, na ca ame amji mã to hane?

¹⁰ Ne atỳj amcro kên cawpa xà jàhtôa to amji mã me ahimpej to me apa. Ne atỳj me Juta catêjê jõ amji kїн jàhtôa kôt me amji ton to meapa. Ampo na mã ca ame amji to hajỳr to prãm?

¹¹ Côt mã ca me Pahpãm pê catyt kam ata te amji kam hapac xà jicu? Ca ha ate me hajỳr na, waha itỳj amji caxwãm pê ita na me ato po mã quê, ne imã amji kїн nare, ne ipeacre ne. He xà pêwa ihcaprỳ na ajco me amã Jeju jarê, ne

to hahkre xà catihti to hahkre toipa ata, xà ajkĩ
ihkôt hamreare?

Pê mam ajco me Pawrô tehcajpar to catia

¹² Jeju kam me ikjêjê, pê ca mam ajco me ito
impej ne nee rÿ jũ caxuw ate ito kên nare atajê,
wa hame apê ipyràac xà na me awÿ. He pê
mam ipê me apyràac, ne me acuxà ampo cawpa
xà atajê cunea kôt ipa. Ne ita caxuw ite ampo
itajêcunea jicu, ne Jeju te amji kam hapac xà to
pit mã amji kampa. Na ca ha ita caxuw me apê
ipyràac, ne me ampo itajê cunea jicu.

¹³ Xà ca atÿj cormã ite mam me amã Jeju jarên
xà ata to me amji japackre? He pê wa ixà, ne me
acahê na ahtwÿ, ne jũ mã amji to amcro to ata
kam, pê wa me amã Jeju te amji kam hapac xà
pejti to hahkre.

¹⁴ Pê ca nee ixà kêanre ata kam me ina acprêc
nare, ne me ito, ihhêj rûm, kÿj rûm Pahpãm mã
memprar catêjê nō, nare, me ito me pajō Pahhiti
pê Jeju Crixto pyràac, ne atÿj ina me amji capa.

¹⁵ Ne pê ca atÿj ajco, tee me atoa to pōj, ne
me imã hōr prãm, ate me itehcajpar prãmte. Ne
pê caxuw me amã ikĩn, ne ampeaj kam ipyrên
megakry. Ne mēr jō ri mã ita caxuw me gakryti
ita? He ihhêj ne nee ita caxuw me gakry nare.

¹⁶ He pê wa nee jũ caxuw ame amã ihêj xi jarên
nare, ne cormã me amã catyt kam to hahkre to
ipa cakrô, ca caa ihhêj ne ipê me acurê xwÿn na,
ame ito amji kampa.

*Pê mehhêj xi catêjê Pawrô te amji kam hapac
xà intête me ta*

17 Mehhêj xi catêjê atajê hãn ne me amã ihhêj to:

— Ampeaj kam me imã akĩn, na wa itỳj me gamã, ne me ato impejti to prãm — hane. Ne camaame amã ihhêj, ne ite amji kam ijapac xà ita tète cute me ahyr, ca mehkôat amji kam me gapac prãmte ri ame amã ihhêj.

18 Pê wa curi ame acahê na imør xà ata kam, pê wa me ate catyt kam me apa na me atehcajpa. Ne pom amcro itajê kam, wa nee curi apu imør nare ita kam, quêha ihtỳj ijaxà kam jũm te me atehcajpar xà ata na imã impej. Ne cute me atehcajpar catêjê atajê, nee mempej nare. Ne cute me ato impejti xà ita toame amã ihhêj, ne ite amji kam ijapac xà ita tète, cute me acaxàr to prãm to ri, ihhêj ne ame amã ihhêj.

19 Me apê imã ikra kĩnti atajê pyràac. Wa ihhêj ne ipê me anã mã me axà, mã tee ame axà te cute amji cupên ata pyràac. Ampo na? He caha me apê Jeju pyràac, ne me apejti to prãm to, wa ha amji pupun to kêanre to ipa kam to icrà, ca ha ahnaa ihcunea na, catyt kam Jeju kôt me apa, quêha cormã ikàj xà ata hamre.

20 Jamã ne wa krãa me akuc ri jỹ, ne ajteare mã me amã icakôc xà nõ to icakôc. Wa itỳjme ato po mã quê, ne me ato pit mãamji kampa ita kam, ramã ikrà pictor tu ita kam, jũ mã wa ha ajte me ato.

Pê Mojxe cama jũm jarkwa kôt me pajàpên catêjê na me pahto

21 Por ca Mojxe jũjarên xà kôt me amji kam gapac to prãm atajê, me ikampa. Wa ha pa me

amã Mojxe jũjarẽn xà ita kôt pahte amji kam mepajapac xà atajê jarẽ.

²² Pê Mojxe me iquêtxwý Aprãw jarẽn kôt me imã harẽ, pê Aprãw mãihkra xũmre ajkrut. Ne pyxit ne cupê Ixamar, ne hĩxi mã hãpên catê cahãj pê Hacakwýj kam ihpým. Ne ihnõ ita pê Ixac, ne inxi pê Xarakwýj pê Aprãw mehĩxia kam ihpým. Ne pê Xarakwýj pê nee cama jũm mã hãpên catê nare, ne ihtýj apu ipa.

²³ Mã ihkĩn te Hacakwýj ita pê Aprãw me hĩxi mã hãpên catê ata, pê Aprãw amjia kôt kam ihkra, pê mam cumã ihpým. Ne quêt Ixac toPahpãm te hũjahkre xaa na pê, inxia kam ihpým.

²⁴⁻²⁵ Ne pyjê pijakrut itajê jarẽn xà kôt, wa ha me amã ita kam me pahte amji kam pajapac xà kôt harẽ. Ne pyjê pijakrut atajê, nee meipipẽnti nare, ne ajpẽn pê ajteare mã me. Ne Pahpãm me, cute me ajpẽn par xà te hajýar, ne nee ipipẽnti nare, ne ajpẽn pê ajteare mã me. Hacakwýj pê Ihcuhhyt jõ kẽnti pyrãac. Por pêPõcapryhti jõ pjê kam, Pahpãm Mojxe mã Juta catêjê caxuw, Ihcuhhyt jõ kẽnti kam, cumã cute me hapackre xà jõr ata, mãr quê catyt kam ihkôt me ipaxà ata pê Hacakwýj ata pyrãac. Ne cama ame cumã me hãpên xà ata kôt Pahpãm te me ahna amji caxàr na to prãm catêjê caxuw ri harkwaita. Ne ahnaa ita kam, Juta catêjê Krĩpinkrên kam mehkrĩ atajê pê Hacakwýj kra pyrãac, ne cama me harkwa ita kôt pit mã ame hãpên to meipa. Ne Pahpãm te me ahna amji caxàr prãmte, ihtýj me hàhcawpa xà cunea kôt me ipa.

Pê Jeju pahtỳj ame papa na me pahto

²⁶ Ne quêt còjkwa kam Krīpinkrên tuw ata pê Aprãw me hīxi ihtỳj apu ipa ata pyrãac, ne cupê me pahnãpê Xarakwỳj ata pyrãac. Ne me pahte Jeju to amji mã me pahhimpej atajê pê Xarakwỳj kra atajê pyrãac. Ampo na? Ihhêj ne Pahpãm Carõ Pejti kôt hipêr me pahpỳpỳm, na ri cupê me pahnã.

²⁷ Ne pê ramã Ixaj xwỳ Pahpãm jarkwa kôt, hõ kàhhôc kam ita na ihhôc to hane he:

“Por cormã nee jũm mã ihkra pỳm nare ata,
gapacta negakryte acarar,
ne amã amji kĩnti ne.
He quê ha ihtỳj, por me cumã mempjê atajê jirôa
pê,
quê ha jũ caxuw amã me akra hàhtô” hane.

²⁸ Mêr hõhõ, me apê Jeju kam me ikjêjê atajê, he me apê Ixac pyrãac, ne Pahpãm te me ato hũjahkre xàa kôt ri me apê Pahpãm kra. Me papê, por pê Pahpãm Aprãw mã ihtàm xwỳ to awjahkre ata mã cu me.

²⁹ Ne caxuw, pom amjia kôt me ajhu ita na pê Ixamar ihpỳm ata pê cama me cumã hàpên catê kracakrô, ajco ihtỳj Ixac to Pahpãm jũjahkre, mã Pahpãm Carõ Pejti kôt ihpỳm ata jahê. Mã cute amji pupun to kêanre xà caxuw pê ajco apu hahê. Ita jĩkjê na mãita kam cute hajỳar he, ne menquêtjê te me hapackre xà kôt me ipa catêjêatajê, cama me papê Jeju kôt me papa catêjê jahê, cute me pahto kên prãmte.

³⁰ Ne pê Mojxe xwỳ ramã ita na Pahpãm jarkwa na hõ kàhhôc kam ihhôc to hane he:

“Ca ha ma jũ kam cama me hàpên catê ita kujate,
ihkramea mã.

Ampo na?

He wa ha nee cama me cumã hàpên catê kra pê
Ixamar ata mã,
ite Ixac pê gĩxia kra mã ampo to ijũjahkre atajê
nõ jõr nare” hane.

³¹ Hõhõ me ikjêjê, he nee me papê, por cama hàpên catê ata kra pyràc nare. Ne quêt me papê Xarakwỳj pê Aprãw me hĩxia kra ata pyràac.

5

¹ Jeju Crixto te mam me panquêtjê himpej xà atajê pê me pahcaxàr, mãr cu pahtỳj amepapa. Cwỳrjapê ca ha nee hipêr jũm himpej xà mã axàr, ne ihkrac ri apu apa nare.

Quê ha Pahpãm nee me pajàpên xà impejti kôt me pahna amji caxàr nare

Jowãw 8.32, 36

² Ýhỹ, ipê Pawrô pê Jeju Crixto jarkwa na imprar catê, ne pa wa ha me amã awjarê, cwỳrjapê ca ha ikam me gapac to impeaj ne he. Ihhêj neramã Juta catêjê kwỳ me awỳr cator, ne cute me amã:

— Ca ha Mojxe te me hapackre xà kôt, cama amji na me ijamã, wa me amã me apy kà kwỳ jakep. Ampona? Ca ha ate ita to hajỳr nare na, quê ha nee Pahpãm ana amji caxàr nare — hajỳr na. Ca ha nee kam me gapac, ne amji na

me hamār, quê me amã apy kàkwỳ jakep nare. Ampo na? Ca ha ate amji na me hamār na, ca ha nee Jeju to pit mã amji mã me ahimpej nare. Quê ha me amã me pajõ Pahhiti tyc xà ita kôt hamreare ne.

Pê Pahpãm amjia kôt me pahna amji capa

³ He wa ha hipêr me amã ita cawpa he. Ca ha me anõ te amji na me hamār, quê ha cute me amã apy kà kwỳ jakep na, hamre, ramã ate Mojxe te mehapackre xà pyxit ne ihkôt amji ton, na ca ha atỳj ate ahpÿanre na ihcunea kam gapac to prãm xà.

⁴ Ca ha Pahpãm te me ana amji caxàr prãmte, ate me Mojxe te me hapackre xà ata pynār na, ca ha ramã me Jeju Crixto mã hikra. He me atea ca mePahpãm te hàhcaprĩa kam, amjia kôt cute me apytàr jicu na me ton, mã cute me gicu.

⁵ He nee me ite me hajÿr nare. He quêt me imã quê ha Pahpãm amjia kôt me ina amji caxàr na me imã hahkre pej. Ne quêt Pahpãm Carõ Pejti carôt ri, Jejuto ite amji mã me ihmpej tỳj na me itehcajpa.

⁶ Cu ha Jeju Crixto na me ajpẽn hõnco ita kam, nee Pahpãm me, me papê ajpẽn pê ajteare mã nare, ne cumã me papipẽn pit. Ne me pahkà jakep me, me pahkà jakep nare itajê me, me Pahpãm mã me papipẽn pit. Ne cumã Jeju to me pahte amji mã me pahhimpej xà ata kôt ri me pamã ajpẽn kїн, ata na ri cumã impej.

⁷ Pÿhàpà! He curmã ca Pahpãm kôt me aprõt kên nare ta? Ne ampo na mã ate amji na me jũm

ita jamār, mǎ cute me ato pry hyr, ca ate me pry hyr?

⁸ He nee Pahpām te hō pry ita tēte me amēn nare, ne ihtýj quēt amji wýr me amā akij.

⁹ He cu ha me pahnō cuhkōn cahàc to cuprō, ne hakôt, quē ha ihkrī ne hipôc ri ihnō kam cô, ne ihcacu, ne amji kôt ihkwý cunea to kên. Ýhý, ita jĭkjê na mǎ jūm te, Jeju te amji kamhapac xà kaj na, me amā ampo kên kryjre to hahkre xà atajê to me acunea to kên.

¹⁰ Ne jūm ata te me amā ampo kên to hahkre cakrô, wa itýj, nee ate mempar nare na, amji mǎ me ato hane. Ne imāa, ca ha me anō te kam gapac, neihkôt amji ton na, ca ha hacpýa mǎ ate amji jaxàr, ne hipêr Jeju te amji kam hapac xà impejti ata pynār na, wa itýj me ato amji mǎ hane. Ne porame amā ampo kên to hahkre to ipa ata, quē ha Pahpām ihtýj cute me ato kên xà ata cwýrjapê to ihtýj tu ne.

Pê Pawrô nee jūm te impy kà kwý jakep to cumã hahkre nare

¹¹ Ýhý me ikjêjê, wa ha me amā amji jarê. He cute me amā ito ihhêj xi catêjê me amā hane he:

— Pawrô cormã mehcunea te mempy kà kwý jakepto me cumã hahkre — hane. Wa ha ite me cumã to hahkre to hajýr na, quē ha nee Juta catêjê jō pahhi kwý itajê ame ito kên nare. Ne mēr ampo na mǎ ame ito kên? Nee mǎ ampo na nare. He wa mehcunea mǎ Jeju te pī kam me pancwýrjapê ihtyc xà ata kôt Pahpām te me pahna amji caxàr na harê, na ri ame ikam incryc.

¹² Ne por ame akrã to acto atajê, quê hapacta ne ihtÿj amji mã mehhy me incre cunea jakep hiahpuro, wa ha nee intête mehcahpêrkàr nare.

*Cu ha ajpën to mempeaj ne
Jowãw 13.31-35*

¹³ Jezu kam me ikjêjê, pê Pahpãm amji wÿr me pamã akij, mãr quê nee pjê kam jÿm cute amji kam hapac xà to pahte amji kam me pajapac xà to ihhimpej nare. Co he! Ca ha nee me anõ ate amji kamgapac xà tÿm kên ata kôt apa prãmte, amji mã:

— Taamã, jÿm nee ito ihhimpej nare ita kam, wa ha itÿj ite amji to amji cajpuaw prãmte, ite ampo ton prãmata cunea to — hajÿr nare. Ne quêt amã me akwÿ kïan kam, cute ampo na mehprãmti xà atajê to ca ha me.

¹⁴ Ne por Mojxe te me hapackre xà atajê, ca ha ihcunea to cuprõ, ne to pyxit peaj to hane he:

“Quê ha amã mehcunea kïn hanea,
pom quê amãa amjikïn he” hane.

Cu ha pahte me ajpën to hajÿr na, cu ha ramã Mojxe te me pajapackre xà atajê cunea kôt me ajpën to.

¹⁵ Nãmri ca ha me apê ampo kên pyrác, ne cama ame ajpën curê, ne ajpën kam me atëm na, ca ha me caa me ajpën jipej. Cupate ca ha atÿj ateamji kam gapac xà na me amji kôpïr to me apa.

*Pahte mam amji kam me pajapac xà kên atajê
pê Carõ Pejti curê xwỳn*

Roman 7.7-25; 8.1-11

¹⁶ Ýhỹ me ikjêjê, ca ha Pahpãm Carõ Pejti te amji kam hapac xà tuw pejti ata kôt me apa na, ca ha nee hipêr ate amji kam me gapac xà tũmkên ata kôt me apa nare. Ne nee ate amji to amji cajpuaw prãmte, ate ampo ton prãmata cunea ton to me apa nare.

¹⁷ Mam pahte amji kam me pajapac xà tũm kên ata me, Pahpãm Carõ Pejti te amji kam hapac xà tuw pejti ita me, cupê ihhêj rũm ajpẽn curê xwỳn. Na ri ihtỳj ajpẽncahpêrkàr to ipa. Na cu nee me pahte amji kam me pajapac xà pejti to me papa to prãm ata kôt me papa nare.

¹⁸ Cu ha pahte Pahpãm Carõ Pejti to amji mã me pahhimpej na, cu ha nee hipêrme hàhcawpa xà me, me to ihhimpej xà atajê to apu amji kam me pajapac nare. Ampo na? Nee hipêrcute me hàhcawpa xà ata me pahto ihhimpej nare.

*Mam pahte amji kam me pajapac xà tũm kên
atajê te hajỹr*

¹⁹ He me pahcunea mã hirãa pê mam pahte amji kam me pajapac xà tũm kêanre te ampo kên cunea na me pah-ton na, pahte me amji jahkre pej. Itajête hajỹr he:

Me pahnõ te me pahprõ kaj na ahti na me pyjê
nõ caxun me,
hanea ne pyjê nõte impjên kaj na, ahti na jũm
xũmre caxun.

He ihhêj rũm me pahkwỳ pê rop pyràac, ne
pahte amji kam me pajapac xà kam me

panxyre kamme pahpahàmti ton to ame
papa.

²⁰ Ne hanea ne Pahpām kaj na, pahnõ te amji
mã mepahpām cahàc krekà cupa me,
pahte me pahkwý to hy to amji kam me
pajapac to me papa me,
pahte me ajpẽn curê me,
pahte me pajarkwa to ajpẽn mãn kên me,
pahte me pajõxý to me papa me,
pahte ajpẽn kam me pancryc me,
amji to pit mã amji kam me pajapac to me papa
me,

pahte ajpẽn cuna mã ame amji jakrã me,
²¹ pahte ajpẽn jũ na ampo kĩn me,
pahkõm ne me papipãn me,
amji kĩn kam, me kam mare mã me pahkõm
catia me,
me ampo kwý jàhtõa pê itajê pyràcti atajê me.

ÿhỹ, he mam pahte amji kam me pajapac xà
tũm kên itajê, ihtýj pahte ampokên itajê cunea
ton na me pahto, cu ton to me papa. Ne pom
ite mam ramã me amã ampo cawpa atajê, wa
ha hipêr me amã ihcawpa. He cute me ampo
kêanreitajê ton catêjê, quê ha nee jũ caxuw
Pahpãm himpej xà krac ri hàr, necatyt kam,
cumã amji kĩnti jakryti kam ipa nare.

*Pahpãm Carõ Pejti te amji kam hapac xà tuw
pejti atajê te hajỹr*

²²⁻²³ Ne quêt Pahpãm Carõ Pejti te amji kam
hapac xà ajteare mã. Quê ha me Pahpãm Carõ
Pejti te me pamã amji jõr na, cu ha me pahte
ampo pejpit ton xà itajê te hajỹr he:

me pamã ajpẽn kĩnti me,
 me pajakryti me,
 ajpẽn mã me pampejti ne me pahcarĩcti na me
 pahkrĩ me,
 ampo te me pahto kên mã me pajũcanãr me,
 ajpẽn mã me pahcaprĩ me,
 pahte me ajpẽn to impejti me,
 cute amji mã me pahto hajỹr me,
 ajpẽn mã me ampejti me,
 ampo kên tête pahte me amji jiprõn to me papa
 me,
 cute amji mã ampo na prãm atajê na amji
 jamãr peaj me.

Ûhỹ, Pahpãm Carõ Pejti ihtỳj pahte ampo pejti
 ton xà itajê cunea na me pahto, cu me ton to me
 papa. Na ri nee jũm xũmre te me hapackre xà
 te ampopejti ita tête me pajiprõn xà hamreare.

²⁴ Ne me papê Jeju Cixtô tekjê atajê te, ramã
 ihhêj ne mam me pahte amji kam me pajapac xà
 tũm kên atajê cunea jipej, mãr cu nee hipêrihkôt
 ame papa nare. Na cu ha nee hipêr me pamã
 ampo kên ton prãmti atajê na me amji jamãr, ne
 me ton nare.

*Cu ha Carõ Pejti te amji kam hapac xà tuw pejti
 ata kôt me papa*

²⁵ Ne me Pahpãm Carõ Pejti ata pê me pajõ
 Pahhiti, cu carõat kôt me papa. Mã taa, me
 pahtoihhimpej, ne pahte ampo pejti ton na me
 pahto, cu ha me ton to me papa.

²⁶ Na cu ha nee ajpẽn jirõa pê amji to me
 pahcati prãm nare. Cu ha pahte me hajỹr na,
 cu ha cama me ajpẽn cyt kam tẽ, ne cama ajpẽn
 jũ na amji to prãm kam me tẽ.

6

¹ Țhỹ, me ikjêjê, quê me akwỳ nō ihhêaj to ampo kên to, ca ahna me hōmpu, ne me apê Pahpām Carō Pejti to ate amji mǎ me ahimpej catêjêatajê, mehtehcajpa, quê ampo kên ton jicu, ne ihcuhtac, ne catyt kam ampo pejti ton to ipa. Ne ate me hapackre xà ata kam, ca ha amji mǎ me aprĩakam, me hapackre. Ne hanea ne ma amji to me guphê, cõt cahanea ne mehkõt ampo kên ton kam tẽ.

² Ne ca ha atỳj me ate amji kam gapac xà kam ampo te me ato kēanre atajê to ate ajpẽn mǎ mehcajcoc na me ajpẽn tehcajpar to me apa. Cu hapahte ajpẽn to me hajỹr to me papa na, cu ha ramǎ me Crixto te mepamǎ harkwa jirên xà atajê kõt me amji kampa.

³ Quê ha jũm te amji to ihcakõc to:

— Wa me hirõa pê icati, ne ipej — hane, ne nee cati ne imej nare xà ata kam ri, taa ramǎ apu amji to amji mǎ ihhêj to ipa.

⁴ Na cu ha ahpỹanre na, pahte amji kam me pajapac xà na me amji kôpĩr to me papa. Na cu ha me pahnõ te pajapên xà imejti ton na, cu ha pahtỳjhũrên me pajakrya, ne cu ha nee amji mǎ:

— Wa ite itajê jirõa pê ijapên xà imejti ton — hajỹr nare. Ne quêt cama amji mǎ:

— Wa ite ijapên xà imejti ton — hane.

⁵ Na cu ha ahpỹanre na, me pajũrkwa caxuw me amji kampa, ne pahtỳj me amji japên xàa to me pajapên to me papa.

⁶ Ne cute me amǎ Pahpām jarkwa to hahkre catê ata, ca ha ma me hamǎ, ne ma cumǎ, amǎ ampo atajê to ajcokjê.

Jũ wỳr cu ha me pahnõ Pahpãm mã pahhêj

⁷ Ca ha nee me anõ amji mã ahêj nare! Jũ wỳr quê jũm Pahpãm mã ihhêj. Xà cu me pahnõ pajõ pur kam, pànkryt xỳ pit kre, quê pijamã kamhàn nỳre nõ cato? Hãpà! Quê ha hỳ pit hapôj. Ita jĩkjê na, cu ha pahte amji kam me pajapac xà kên to pit mã amji kampa, cu ha nee hahpan xà naampo pejti pyr nare, ne hahpan xà naampo kên pit cwa. Jũ wỳr cu pahte ampo kên ton xà ata kôt, me Pahpãm mã me pahhêj, cute me pamã ampo pejti jõr prãmte. Cu pahte ita to amji kam me pajapac na, cu ha me paa, ramã, amji mã me pahhêj.

⁸ Cu ha mam pahte amji kam me pajapac xà tũm kên ata pit kôt me papa na, cu ha ramã Pahpãm kaj na ampỳa mã ame papa, ne me ty, ne me acto rohnỳtti mã. Ne cuha quêt Pahpãm Carõ Pejti te amji kam hapac xà tuw pejti ata kôt me papa na, cu ha quêt Pahpãm cahê na me pahkrĩ rohnỳtti mã.

Cu ha nee me ampo pejti ton jicu nare

⁹ Cu ha nee me ampo pejti ton to mehkĩn hi nare, ne pahtỳj pahte ampo pejti ton xà ata kam me awcanã. Ne hahpan xàa na, quê ha Pahpãm me pamãampo pejti gõ.

¹⁰ Ne atỳj ate mehcunea mã ampo pejti ton na, ca amji to ahcukij. Ne Jeju kam me pahkjêjê to, ca ha me hirõa pê impej.

Pawrô me pancwỳrjapê Jeju tyc xà ita to pit mã apu ihcakôc

¹¹ Ita caxuw, wa ha ijũhkra to me amã ihhõc, ca me hõmpu. Mã ihhõc cati pit he, mār ca me ijahkre pej, nāmri pa wa me amã ihhõc.

¹² Ne por me amã ihhêj catêjê atajê ri, cama amji to ame hãmnan to me ipa. Ne Jeju te amji kam hapac xà kaj na me amã harên to:

— Ca ha apy kàkwỳ crire ne hakep xà ata kôt, quê ha Pahpãm ihtỳj ana amji capa — hane. Me pajõ Pahhiti curê xwỳn te ame to kên cupate ri, nee me amã:

— Pĩ kam me pancwỳrjapê Jeju tyc xàa kôt, quê ha Pahpãm me pahna amji capa — hajỹr nare.

¹³ Ne cute mempy kà jakep xà ata to me amji kam hapac to me ipa cakrô, nee me Mojxe xwỳ te me hapackre xà cunea kôt me ipa nare. Ne mēr ampona mã ame amã apy kà jakep prãm? Nee mã ampo na nare. Cumã cute me hũnār catêjê jàhtôa na, cute amji to me hãmnan prãmte ri ame hane.

¹⁴ Ne pa nare, wa quêt me pancwỳrjapê me pajõ Pahhiti Jeju Crixto tyc xà ata to, wa mehcuneamã, ijãmnan to ipa. Ne por Jeju te amji kam hapac xà curê xwỳn te amjikam hapac xà itajê, nee icajpuaw nare. Na ri me imãa, cute amji kam me hapac xà itajê pê ampo tyckro pyrãac. Ne hanea ne ite Jeju kôt amji kam ijapacxà ita, nee me hũmre atajê cajpuw nare. Na ri me cumã ite amji kam ijapacxà ita pê ampo tyc kro pyrãc, ne ihkêanre.

¹⁵ Ne Pahpãm mã, jũm te amji kà jakep ata me, cute amji kà jakep nare atajê pipên pit, na ri me ipijakrut itajê na, nee Pahpãm te amji caxàrnare.

Cu ha Pahpãm te amji kam hapac xà kôt me papa na, quê ha me pahcunea to antuw, ne me pahto intuw. Cu ha me papê curmã ampo tuwti ata, quê ha cormã me pahna amji capa.

Pê Pawrô Pahpãm mã mehkwy cajrën pej

¹⁶ Ne wa itÿj Pahpãm mã me acajrën to hane he:

— Ỡhỹ me Ijõ Inxũ, wa cute, ite me hapackre na me ipar atajê mã, wa ha ana ahwÿ, ca me caxwÿncaxwãm pê me cumã acarĩcti gõ, mār quê nee cumã ampo hũpa nare. Ne ca ha me akwÿ cunea caprĩ, ne me to impej — hane.

¹⁷ Hamre, he nee hipêr imã, ramã ite me amã ampo jarën itajê jarën prãm nare. Wa ramã ite ita cwÿrjapê amji pupun to kêanre, ne pom ijĩkam apu icaxõti itajê, ramã ipê Jeju mã ijapên catê na ijarê. He nee ipy kà jakep xà caxõ ata, ipê Pahpãm tekjê na ijarën nare. Ne quêt ite mehcunea mã Jeju jarën cwÿrjapê jũm te icahhyrjaxà kam caxõ, ita ri quêt ipê Pahpãm tekjê na ijarê. Na ri nee hipêr jũm te, ite amji pupun xà kêanre na iton xà hamreare.

¹⁸ Ne imã me pajõ Pahhiti pê Jeju Cixtô te amjia kôt, me apê me ikjêjê itajê cunea to, cute impej na to prãm. Taamã, hamre.

PAHPÃM JARKWA CUPAHTI JÕ KÀHHÔC
Canela: PAHPÃM JARKWA CUPAHTI JÕ KÀHHÔC
(Portions)

copyright © 2012 Wycliffe Bible Translators, Inc.

Language: (Canela)

Contributor: Wycliffe Bible Translators, Inc.

All rights reserved.

2020-11-16

PDF generated using Haiola and XeLaTeX on 1 Oct 2024 from source files
dated 29 Jan 2022

09d4e460-c38b-52b7-81c1-8300bfeb466a